

Protocol dalla radunonza communal dils 29 da november 2019 allas 20.15 uras en casa da scola a Breil-vitg

Perstgisas: Andreas Cadonau, cumissiun da quen e gestiun
Prisca Sgier, cussegliera
Maurus Tomaschett, cussegliar
Michael Friberg

Presenza: 33 persunas

Tractandas:

1. Beinvegni ed approbaziun dil protocol dils 30 da november 2018
2. Preventiv e quen d'investiziun 2020
3. Pei da taglia 2020
4. Varia

Beinvegni ed avertura

Il president communal, Clau Schlosser, fa a tuts presents in cordial beinvegni, alla radunonza communal.

Il president communal resumescha las lavurs principalas dil davos onn e tgei che ha fatschentau la suprastonza il pli fetg.

Sco dumbravuschs vegn Ludvig Desax, Dardin nominaus ed elegius unanim.

La gliesta da tractandas, ch'ei stada publicada els davos fegls officials, vegn suttamessa alla discussiun. Da tala vegn buca fatg diever e per consequenza vegn la gliesta declarada ligionta per la radunonza communal da questa sera.

1. Approbaziun dil protocol dils 30 da november 2019

Il protocol ei staus exponius sin canzlia communal sco era sin la pagina d'internet dalla vischnaunca. Dalla discussiun vegn fatg negin diever. Il protocol dalla davosa radunonza communal vegn per consequenza approbaus entras tscharna unanima.

2. Preventiv e quen d'investiziun 2020

Il preventiv siara suenter expensas da frs. 12'786'650 ed entradas da frs. 13'240'517 cun in surpli entradas ell'altezia da frs. 453'867. Quei preventiv ei vegnius fatgs per la gronda part tenor la cefras dil quen 2018. Aschia corrispunda quel plitost alla realitad visavi quels dils davos onns. Il quen d'investiziun preveda expensas da frs. 3'990'000 ed entradas da frs. 955'000. Las investiziuns netto muntan per consequenza a frs. 3'035'000.

Il president communal repassa il preventiv dil quen current sco era il quen d'investiziun e dat scleariments necessaris tier diversas posiziuns. Allas damondas tschentadas vegn dau risposta. Ils presents approbeschan il preventiv sco era il quen d'investiziun 2020 cun tscharna unanima e senza resalvas.

Suenter l'approbaziun presenta il president aunc il plan d'investiziuns per ils proxims treis onns. Quei plan ei in instrument da lavur per la suprastonza ed aschia semida quel ualti spert. La radunonza pren enconuschientscha dil plan d'investiziuns per ils proxims treis onns.

3. Pei da taglia 2020

Mintg'onn han il cussegl da vischnaunca e la radunonza communal la pusseivladad da fixar il pei da taglia sin entradas sco era il pei da taglia sin schischom. Cun la fusiun ei il pei da taglia dalla vischnaunca da Breil vegnius fixaus sin 100% dalla taglia cantunala e quei sin fundamt dallas investiziuns previdas per ils proxims 5 onns. Ils proxims onns spetga tenor il plan d'investiziuns in grond buordi sin la vischnaunca, aschia ch'ei fuss ussa buca prudent da reducir il pei da taglia. Igl uffeci da vischnauncas sco era la cumissiun da quen e gestiun sustegnan medemamein la proposta dalla suprastonza da buca sbassar il pei da taglia sin entradas. La taglia sin schischom sto tenor lescha da taglia vegnir fixada mintg'onn da niev. Quella taglia importa denter 1.5 entochen 2.0 promils. Il cussegl sco era la suprastonza communal fan la proposta da restar sco tochen dacheu sin 1.7 promils.

La damonda vegn suttamessa alla discussiun. In vischin ei dall'idea, che la vischnaunca seigi buca attractiva avunda cun haver il pei da taglia sin 100%. El ei era dil meini che la suprastonza stuessi mirar che pli biaras famiglias vegnien si Breil a star. In auter vischin manegia avon che reducir il pei da taglia, seigi da far ina studia cun ils avantatgs e disavantatgs dad ina reducziun dil pei da taglia. Propostas per reducir il pei da taglia vegnan buca fatgas. Aschia fa la suprastonza ed il cussegl la proposta da schar il pei da taglia sco tochen dacheu. Cun tscharna unanima decida la radunonza communal da fixar il pei da taglia ordinari sin 100% dalla taglia cantunala sempla ed il pei dalla taglia sin schischom sin 1.7 promils.

4. Varia

Clau Schlosser informescha la radunonza sur dil suandont:

Dil maletg empalont dalla vischnaunca (kommunales Räumliches Leitbild) ha la populaziun giu la pusseivladat da prender investa sin canzlia communal. Igl interess ei denton staus ualti pigns. Il president fa aunc ina gada attents la populaziun ch'ei dat la davosa pusseivladat da prender posiziun tier quei document els proxims 15 dis. Il document sa vegnir retratgs sin canzlia communal. Suenter vegn il maletg empalont publicaus publicamein.

Il president communal informescha la radunonza sur dil stan actual dalla via da colligaziun denter Breil e Vuorz.

Alla davosa seduta dil cussegl da vischnaunca ei Prisca Sgier da Danis vegnida elegida sco nova presidenta dil cussegl per il proxim onn. Sco vice-president havein elegiu Tarcisi Dietrich d'Andiast.

Clau Schlosser engrazia per la presenza, la participaziun e la confidanza. El siara la radunonza allas 21:15 uras e giavischa a tuts in bien retuorn a casa.

Breil, 2 da december 2019

Il president

Clau Schlosser

Igl actuar

Curdin Cadonau